

«En nossa casa vivan 77 soras»

Gl'onn 2023 vegn ad esser in special per sora Berta Maissen. Gl'onn 1963 ha ella brattau siu dacasa a Siltginas sur Sumvitg culla **claustra dallas soras dominicanas** da Glion. Enteifer la cuminonza religiosa eis ella aunc adina activa, ella vala sco «allroundra» dil survetsch da casa.

AUGUSTIN BEELI/FMR

Leugiu ella claustra veglia da sogn Giusep eri tut auter, pli stretg, pli vegl, «nus novizas eran en ina sala cun 22 letgs, separai sulettamein d'umbrivals», seregorda sora *Berta Maissen*. Gl'onn 1970 lu ina emperneivla midada. El dacasa niev, ella claustra moderna si Quinclas, ha mintga sora survegniu in'atgna combra. Sora Berta ei entrada 1961 ella cuminonza dallas soras **dominicanas** da Glion, dus onns pli tard ha ella fatg il profess perpeten. Ella raquenta quell'episoda duront il discuors culla FMR, ella stanza da sesidas davos la caffetteria dalla claustra. Sper ella sesa sia sora. «Nus eran cheu quater soras, ussa essan nus aunc en treis», di sora *Ermelinda Maissen*. La tiarza, sora *Armina Maissen*, maunca, ella ei actualmeins maldisposta pervia d'ina gripa. Lur sora pli veglia, sora Theolinda, ei morta gia 1995.

La casa paterna ei barschada 1967

Igl ei ina constellaziun speciala che quater dallas 12 feglias da Placi Aluis e Mathilda Maissen-Riedi han partiu plirs decennis il dacasa ella claustra da Glion. Sora Berta di ch'ellas seigien carschidas si a Siltginas sur Sumvitg. «En tut eran nus 16, treis frars ein morts sco barets ed ina sora da buoba.» La claustra da Glion seigi daditg lur dacasa, remarca sora Ermelinda. «Nossa casa paterna ei gie barschada giu, cun clavau e tut», di ella. Fertion ch'ella era lu a Tavau ei quei eveniment dil schaner 1967 aunc fetg presents a sora Berta. «Jeu luvravel lu egl **Albertushof** cheu a Glion. Nus havein viu ch'ei sclareva e fimava zanza ella Cadi», seregorda ella aunc. Cuort suenter ei la novitad vegnida ch'igl eri la casa paterna a Siltginas.

Sora Berta vala ella claustra da Glion sco dunna dalla pratica. Ella ha adina luvrau bugen culs mauns. Ed ei aunc adina ina persuna fetg tscherca da el menaschi claustral. Ella segidi bugen cul survetsch tecnic da casa, conceda ella. Trasora dat ei ch'ina batteria maunca en ina combra, ch'ins sto remplazzar il pér d'ina cazzola ni ch'ins astga sliagir in auter problemet. Dapi in temps eis ella respon-

sabla pil post da reciclar dalla claustra. Ella rimna e zavra cartun, plastic, veider, ligia faschs da pupi vegl, pren encunter alumini, rauba da dimensiun. Oz eis ei in impurtont post en casa e menaschi. Gidar, contribuir per la cuminonza, esser cheu per auters, quei ei sia vocaziun.

Buc astgau eleger il num

«Nus essan ina gronda famiglia», manegia sora Berta. La stad vargada ha ella cumplenu 80 onns. Biars sedamondien sch'ellas fetschien propi gl'entir di nuot auter che oraziun. «Jeu stoi dir che l'ora-

«Nus essan daditg da casa cheu en claustra.

Nossa casa paterna ei gie barschada giu.»

sora Berta Maissen,
claustra Glion

ziun ei veramein miu tancadi pil mintgadi. Mo mintgaton stuein nus bunamein engular quei temps», conceda sora Berta ed aschunta che la lavur seigi la finala era oraziun. Berta ei dil reminent buca siu num da batten. Cun entrar ella cuminonza religiosa s'empermettan las soras a Cristus, sco segn da quei survegnan ellas, cul profess perpeten, in niev num. «Pli baul astgavan nus buc eleger sez-zas quel», declara la sora. «Jeu sun fetg leda che las superiuras han elegiu lezza gada in num che ha adina plaschiu a mi.» Siu num da batten tradescha ella discretamein: «Balugna».

Fertion che sora Ermelinda ei responsabla per la cusunzaria dalla claustra, ei sora Berta quella che tschappa bugen en nua ch'ei fa gest da basegns. Quei ei aschia dapi ch'ella ei s'empermetta 1963 alla clamada claustrala. La vegetariana ha ina historia professiunala pli speciala. Sora Berta ei buca stada scolasta, era buca tgirunza. La «sora dalla pratica» ha luvrau ils emprems onns egl iert claustral, lu duront 12 onns sil menaschi puril **Albertushof**. Igl era du-



ront decennis la centrala da vivonda dalla claustra e dil spital. Sora Berta ha luvrau ella mazlaria, respectivamein ella producziun da carn. «Jeu hai sturniu e mezchegiau bia pulam, biestga e pors», di ella e conceda ch'ella hagi fatg quei nuidis, mo per survir e far obedienscha. Il senn da sia vocaziun claustrala era ei buc. Perquei eis ella stada leda che sias superiuras han acceptau il giavisch da midar en in auter sector. «Jeu sun ida en Tiaratudestga nua ch'jeu hai jeu empriu, cun 34 onns, da senudar. Suentersundel jeu seperfectiunada ed hai era fatg il brevet.»

La scolasta da senudar

Cu gl'institut niev cun internat ei s'aviarts 1975 si Quinclas, vuleva negin surprender il post da caubogn dil bogn cuvretg. Senza ch'ella havessi planisau quella carriera, ei il brevet da senudar e la scolaziun da samaritana stada d'engrau a sora Berta.

Duront 30 onns eis ella stada responsabla pil menaschi da bogn, ella ha dau cuors da senudar e mirau digl implont. Igl ei stau ina lavur che ha dau bia satisfaziun alla sora dominicana. Ils temps semidan denton. Daferton ei il bogn cuvretg serraus dapi diesch onns, gl'**Albertushof** ei en vendita ed era il menaschi dalla scola mercantila vegn a bargigliar en zacons onns alla staziun nova da Gliion. «Nus capitulein segir buca», puntuescha sora Berta denton. Il diember da habitontas sereducescha dad onn tier onn. Sia sora – e consora – Ermelinda dat il tgau. Lur dacasa semida cuntinuadamein, las mungias ston s'adattar ed acceptar, e ponderar tgei che duei schabegiar cun lur casa. Ruas e cunfiert anflan ellas, malgrad la malsegirtad ed empau hectica duront las fiastas, ella gronda famiglia dallas 77 soras.



Las soras Ermelinda (sen.) e Berta Maissen avon la renomada stalla ella baselgia claustrala.

FOTO AUGUSTIN BEELI